

ALAHADY FAHA 21 MANDAVANTAONA - B



“Tompo ô, hankany amin’iza àry izahay? Ianao no manana ny teny fiainana mandrakizay”.

Ry Kristianina havana, raha tamin’ny alahady lasa teo nankalaza an’I Masina Nampakarina vatana sy fanahy any an-danitra isia, dia omaly kosa niara-nankalaza an’I Victoire Rasoamanarivo Olontsambatra. Fahasoavan-dehibe ho antsika izany rehetra. Noho ny fankalazana an’I Masina Maria Nampakarina vatana sy fanahy any an-danitra dia niato kely ny fandalinantsika ny toko faha 6n’I Md Joany. Tohizantsika indray ny fandalinantsika azy izany hoe ny fandalinana ny Eokaristia miainga amin’ny Evanjely Joany toko faha-6 izay manambara ny famantarana nataon’I Jesoa dia ny

fampitomboana ny mofo ka niainga avy amin’izany Izy no nampianatra ny fanorenana ny Eokaristia loharano sy fototra ny fiainantsika. Anatin’izao fiainantsika miatrika an’ity KORONTANAVIRUS ity izao sy amin’izao fiomanana akaiky ny fidirantsika amin’ny Sinaoda izao isika miaraka amin’ireo fanamasinana sy fankalazana ny faha-120n’ny eglizy trano eny offe Ville no mihaino ny fampianarana

Vakiteny I : Jôh. 24, 1-2a. 15-16 sy 18b

Tononkira : Salamo 33

Vakiteny II : Efez. 5, 21-32

Evanjely : Jo. 6, 61-70

lalina atolotr’I Jesoa. Henontsika tsara fa tafintohina tamin’ny fampianaran’i Jesoa ireo Jody ary androany indray henontsika indray fa tsy ireo jody ihany no nimonomonona sy tafintohina tamin’ny fanambaran’I Jesoa momba ny tenany izay lazainy fa mofo velona avy any an-danitra fihinana ny vatany, ary fisotro ny ràny fa maro tamin’ireo mpianany koa no tafintohina. Tsy afenina koa fa misy no taitra tamin’ireo nandre an’I Jesoa tamin’ny fotoanandrony fa tsy mbola misy lehilahy miteny sy mampianatra toy azy, matotra ny fampianarany, tsy vitany fampianarana ihany no ataony fa misy famantarana ka nahatsapa izy ireo fa tsy manao kobaka am-bava izy ary izany koa no mbola anaovany fampianarana matotra androany.

Maro ireo vahoaka nanaraka an’I Jesoa noho izany fampianarany izany kanefa tao amin’ireo vahoaka ireo dia nisy nanaraka Azy noho ny famantarana ihany ka rehefa tsy hitany intsony ny famantarana dia niova ny heviny ka lasa tsy nanaraka an’I Jesoa intsony fa nanaraka zavatra hafa. Mbola hitantsika izany amin’izao andro iainantsika izao fa indrindra moa amin’izao sedra mafy

entin'ity KORONTANAVIRUS ity. Na ireo vita batemy aza no very “fanahy mbola velona” ka tsy mahita intsony no lalan-kombana. Tamin'ireo nanaraka an'i Jesoa ireo na dia tsy nisy aza ny famantarana, nisy ihany koa ireo azo lazaina fa mpianatr'I Jesoa, mpihaino Azy ary nahaliana azy ireo ny fampianarany fa eto dia ireo mpianatra ireo ihany koa nisy tafintohina ary lasa niverin-dàlana. Aza gaga izany isika raha mahita ireo vita batemy “miverin-dalana”. Fantantsika fa misy izany amin'izao androntsika izao, naheno ny fampianarana, nandalina ny finoana, io ilay hoe vita raha jiaby dia lasa niverin-dàlana ka tsy nanohy ny fandalinam-pinoana intsony.

Amin'ireo mpanara-dià an'I Jesoa dia misy ihany koa ireo mpianatra nanaraka ary nandalina ny finoana, anisan'izany ilay tovolahy nanontany hoe *“inona ny ataoko ahazoako ny fiainana mandrakizay?”*. Izay ihany koa tamin'ireto mpianatra nahita ny famantarana tamin'ny fampitomboana ny mofo sy ny fampianarana nataon'I Jesoa dia nanaraka nefa rehefa nolazainy fa lzy no mofo mahavelona avy any an-danitra ary tena fihinana ka hahazoana ny fiainana mandrakizay ny vatany sy ny ràny dia tafintohina satria sarotra amin'izy ireo ny nahazo ny dikan'ny fampianarana izany ka lasa izy ireo.

Misy tamin'ireo mpianatra mpanara-dia an'I Jesoa, ireo atao hoe apôstôly, mpanara-dia an'I Kristy akaiky izay hitantsika amin'ny Evanjely androany ka I Md Piera no nisolo vava izy ireo rehefa nanontany I Jesoa hoe ary ianareo mba ahoana ? Namaly I Piera nanao hoe *“hankany amin'iza izahay ianao no manana ny teny fiainana ary izahay efa nino sy nahalala fa ianao no ilay masin'Andriamanitra”*. Fiekem-pinoana izany ary mahatonga antsika ho iray ao amin'i Jesoa sy mahatonga antsika ho taranaka mpanorina satria mitoetra ao amin'I Jesoa sady itoreran'I Jesoa, finoana izany. Ny finoana tokoa no mampiombona amin'I Jesoa fa tsy zavatra hafa na oviana -na oviana. Azontsika onona tsara, azontsika mazava tsara ny mahatonga antsika milaza hoe “Apostoly Lahika” ao amin'ny vavaka ho an'ny vôkasiona, fiantsoan'Andriamanitra. Ny tanjona dia ny haha Apostoly tokoa ny vita batemy izany hoe hahatonga azy ho EOVI MISIONERA VITA BATEMY KA IRAHINA HO TABERNAKLA VELONA. Io no antony no mahatonga antsika matrika izao SINAODA izao.

Ny fiainana sy fitoerana amin'I Jesoa no tena finoana, hifikitra sy hiaraka amin'I Jesoa ka mahatonga an'ireo ho Jesoa velona sy mpiara-belona amin'olona amin'izao fotoana izao. Fampianarana lehibe ho antsika ny voalazan'I Piera sy ny fiekem-pinoana nataony.

Ny vakiteny voalohany dia mampahatsiaro ny mety azo lazaina ho “loharanon'ny fiekem-pinoana”, nanavao ny fiekem-pinoana ny vahoakan'Andriamanitra, mila safidy ny finoana ary izany no lohahevitra omen'ny Eglizy amin'izao Alahady tsotra faha-21 mandavantaona izao : mahay mifidy sady mivelona izay fidina. Izany no antenaintsika lalina dia lalina aorian'ny SINAODA hahatonga antsika hametraka SAFIDYMARIM-POTOTRA tsara izany hoe hitoetra ao amin'I Jesoa isika sy itoerany ka hamokatra be, fa alohan'izany tsy maintsy mahafoy isika ary vonona hanompo. Manana modely isika amin'izany dia I Masina Maria sy ireo Olomasina sy Olontsambatra toa an'I Victoire, Lucien Botovasoa. Io fahafoizana io sy io fanompoana io no manambara fa manana finoana velona isika izany hoe tena Apostoly.

Ny mahatonga antsika mikorontana ohatry ny voalaza ao amin'ny vakiteny voalohany ka nilaza an'I Josoe dia ny tsy fahafantarana ny fototra ka mivezivezy isika ; aiza ary isika ity, inona ny ataontsika ? Mazava ny fampianaran'I Josoe ka nahatonga ny olona hanambara mazava ny safidiny. Izany ihany

koa no kendrentsika amin'izao Sinaoda izao mba hahatonga antsika ho taranaka mpanorina, hanorina ny EOY sy ETA ka hanavao ny fifandraisantsika amin'Andriamanitra sy samy olombelona ary amin'ny zava-boaary. Izay no ny nataon'ny vahoaka hiroso amin'ny tany nampanantenaina. Ny tany nampanantenaina ho antsika dia hahatonga antsika HO EOY MISIONERA TABERNAKLA VELONA.

Ka io no fanorenana tontolo telo izay tena potika tokoa. Ity KORONTANAVIRUS ity no mampibaribary ny fahapotehin'io tontolo telo io. Tontolo telo mandrafitra ny mahaolona.

Ny tontolo iainana no hanajantsika, hiarovantsika ary hanatsarantsika, handavorariantsika ny zava-boahary manodidina antsika ka hahatonga ny tontolo iainanamaintso ma melona antsika. Toa izay ho fahavalo ny zava-boaary sika tahaka ny zava-misy amin'izao dia zary ho MPIARA-DALANA MIFAMELONA MIFANASOA ARY MIFAMPITSIMBINA NY ZAVA-BOAARY SY NY OLOMBELONA. Ho Tontolo iainana mamelona tokoa tahaka ny naharian'Andriamanitra azy tamin'ny voalohany. Io ny vokasionsika olombelona raha napetrak'Andriamanitra tao amin'ny sahan'Edena ny olombelona hatramin'ny voalohany : ho MPIAMBINA SYMIKARAKARA fa tsy hanjakazaka...

Ny tontolo tena efa potika dia ny tontolom-piainantsika samy olombelona, izay anjakan'ny fialonana, ny fitiavan-tena, ny fanapotehana, fandravana sy fanilikilihana ireo manodidina antsika ka havaozintsika miaraka amin'I Kristy izany tontolom-piainana izany mba hitoeran'ny fifanajana, hanjaka ny rariny sy ny hitsiny ary ny fahamarinana ka entintsika mampivoatra ny fiainantsika andavanandro. Raha mifanaja, mifanasoa, mifampitsimbina vokatry ny fahafoizana sy fanompoana dia manoro TONTOLOM-PIAINANA MITONDRA AMIN'NY FIVOARAN'NY MAHAOLONA MANONTOLO SY NY OLON-DREHETRA. Io tontolom-piainana mikolokolo ny fihavanana sady kristianina no malagasy io no mitondra amin'ny fanorenana ny fianakaviam-ben-janahary : FRATELLI TUTTI=OLOARAIKY ISIKA JIABY.

Mila ainga vao koa ny tontolom-pinoana mba hitondra antsika hametraka an'I Jesoa ho ivon'ny fiainana sy ivom-piainantsika ka hahatonga antsika EOY itoeran'I Jesoa sy itoerantsika ao Aminy, Vokatry ny fandalinana ny finoana manampy antsika haneho ny maha zanak'Andriamanitra antsika ka ny famindram-po sy ny famelan-keloka no handrindrantsika ny fiaraha-monina misy antsika ka hiadam-pinaritra isika araka ny tenin'ny Papa : tsy ho hisy na oviana na oviana ny fiadanana sy ny fandriam-pahalemana raha tsy ny famindram-po sy ny fifamelon-keloka miaraka amin'ny fahamarinana no entintsika mandrafitra ny fifandraisana eo amin'ny fiainantsika.

Ny dikan'ny fanompoana dia ny fampanjakana sy fanorenana ireo tontolo telo ireo izany hoe manompo ny Tompo Andriamanitra araka ny voalaza amin'ny vakiteny voalohany, mampiova ny fifandraisana ao anatin'ny fifampitokisana sy fifankatiavana araka ny ampianarin'I Md Paoly ao amin'ny vakiteny faharoa androany izay anambarany fa ny loharano sy ny fototr'izany rehetra izany dia ny Eglizy kely fianakaviana ka aoka ho Kristy tokoa no eo anivon'ny fianakaviana ka zary Eglizy kely tokoa ka ny Eglizy kely manorina ny Eglizy fiombonana, ny Eglizy fiombonana manorina ny Eglizy fototra ary ny Eglizy fototra manorina ny Eglizy iraka ka hahatonga ny fanjakan'Andriamanitra hiitatra sy hihatsara eo anivon'ny fiainantsika. Mazava amintsika ihany koa ny mahatonga antsika hisafidy ny FIANAKAVIANA HO FOTOTRY NY DINIKA REHETRA amin'izao sinaoda izao. Milaza miaramahita anefa isika fa marary ny fianakaviana. Misedra zavatra maro ny fianakaviana. Ny fianakavianano victime voalohany. Raha te hanarina ireo tontolo telo potika ireo isika dia tsy

maintsy miainga any amin'ny loharano sy fototra. Mirindra ny fiainam-pianakaviana hoy Md Paoly raha manjaka ao ny fahafoizana, sy fanompoana ary ny fahamarinana mitondra amin'ny fifampitokisana sy fifanajana vokatry ny fifamelan-keloka sy famindram-po.

Ry Jesoa Tompo ô, nampianarinao anay fa ianao tokoa no tenin'ny fiainana. Maro ireo izay nanodidina Anao no lasa nandao Anao ary nalain-kino izy ireo koa ampio izahay mba ho tahaka an'i Md Piera hanambara tsy amin'ny teny fotsiny fa amin'ny fiainanay manontolo fa ianao tokoa ny safidinay, ianao no manana ny teny mahavelona. Enga anie izahay ho famantarana an'izany teny mahavelona izany eo amin'ny fiainanay ka hahafahanay hizara amin'ny hafa izany teninao mahavelona izany.

Enga anie izahay ho tena EOY na inon-kidona na inon-kihatra, ianao irery ihany no fiainanay, ary ataovy miray hasambarana sy hiray aina ao Aminao izahay amin'ny fiainanay ety an-tany ka hatramin'ny fiainana mandrakizay ka hahatonga anay ho tena taranaka mpanorina EY sy EOY MISIONERA TABERNAKLA VELONA ho vavolombelon'ny teninao eo anivon'ny fiaraha-monina misy anay ka hiadam-pinaritra ao Aminao tokoa izahay.

Masina Maria Renin'I Jesoa, Renin'ny Apostoly, tsy miafina Aminao ny sedram-piainanay. Hiatrika ity sinaoda ity izahay. Mitebiteby izahay. Mavozo tahaka ireo Apostoly tamin'ny voalohany. Mivavahà ho anay mba hanana herim-po tahaka an'I Victoire Rasoamanarivo izahay, tahaka an'I Frera Louis Rafiringa. Notantaninao I Victoire ka nantsoin'ny maro ho Anjely Mpiaron'ny finoana. Anjely Mpiaro ny finoana tokoa izy satria nahafoy sy nanompo ny Eglizy. Izy sy Frera Rafiringa no Misionera tamin'izay fotoana izay satria lasa daholo ireo misionera voalohany. Modely ho anay izy amin'izao ezaka ataonay hanorina EOY MISIONERA izao. Hivavaka ho anay koa anie izy. Md Josefa Ray Mpiaro ny Eglizy erantany ampio izahay mba tsy ho rendrika amin'ny dia ataonay amin'izao SINODA izao.

Amen

Mompera Arseveka Mgr Benjamin Ramaroson